

Ոչ պաշտոնական թարգմանություն
ՀՀ մարդու իրավունքների պաշտպանի աշխատակազմ

**Խոշտանգումների կանխարգելման ասոցիացիայի
գլխավոր քարտուղար Բարբարա Բերնաթի բաց նամակը
Հայաստանի Հանրապետության Ազգային ժողովի նախագահ
Արարատ Միրզոյանին
Հայաստանի Հանրապետության կանխարգելման ազգային մեխանիզմի
անկախության վերաբերյալ**

Ժնև, մարտի 26, 2021

Հարգելի՛ նախագահ Միրզոյան,

Խոշտանգումների կանխարգելման ասոցիացիան միջազգային ոչ կառավարական կազմակերպություն է, որի հիմքում «Խոշտանգումների և այլ դաժան, անմարդկային կամ արժանապատվությունը նվաստացնող վերաբերմունքի կամ պատժի դեմ» ՄԱԿ-ի կոնվենցիայի կամընտիր արձանագրությամբ ստեղծված՝ խոշտանգումների կանխարգելման միջազգային համակարգն է:

Այս համակարգն իրավունք է վերապահում միջազգային մարմնին՝ ՄԱԿ-ի Խոշտանգումների կանխարգելման ենթահանձնաժողովին և 90-ից ավելի երկրներում գործող Կանխարգելման ազգային մեխանիզմներին անկախ մշտադիտարկում իրականացնել ազատությունից զրկման բոլոր վայրերում: Մենք սերտորեն համագործակցում ենք ՄԱԿ-ի Խոշտանգումների կանխարգելման ենթահանձնաժողովի և ամբողջ աշխարհում գործող Կանխարգելման ազգային մեխանիզմների հետ՝ հզորացնելու համար այս համակարգը և կանխարգելելու համար խոշտանգումներն ու վատ վերաբերմունքը: Այս համատեքստում, մենք Հայաստանի մարդու իրավունքների պաշտպանի (Կանխարգելման ազգային մեխանիզմի) հետ սերտ և կառուցողական համագործակցության երկար տարիների փորձ ունենք:

Ձեզ եմ դիմում 2021 թվականի մարտի 11-ին ՀՀ կառավարության ներկայացրած՝ «Մարդու իրավունքների պաշտպանի մասին» ՀՀ սահմանադրական օրենքում առաջարկվող փոփոխությունների կապակցությամբ: Հասկանում եմ, որ առաջարկվող փոփոխությամբ ուժը կորցրած է ճանաչվելու «Մարդու իրավունքների պաշտպանի մասին» ՀՀ սահմանադրական օրենքի 8-րդ հոդվածի 5-րդ մասը, որով սահմանված է, որ յուրաքանչյուր տարի Մարդու իրավունքների ազգային հաստատության և Կանխարգելման ազգային մեխանիզմի ֆինանսավորման համար պետական բյուջեով նախատեսված հատկացման չափը չի կարող

պակաս լինել նախորդ տարվա պետական բյուջեով նախատեսված հատկացման չափից: Ավելին, այս փոփոխությունները նախաձեռնվել են առանց Մարդու իրավունքների պաշտպանի հետ պատշաճ խորհրդակցության կամ քննարկման:

Այս առաջարկները պետք է դիտարկվեն նաև մեզ հաղորդված այլ գործողությունների համատեքստում, որոնք բացասական ազդեցություն են ունեցել Մարդու իրավունքների ազգային հաստատության և Կանխարգելման ազգային մեխանիզմի առկա ռեսուրսների և տեխնիկական կարողությունների վրա, ներառյալ՝ պետական մեքենաների օգտագործման սահմանափակումները, որոնք էական նշանակություն ունեն նրա աշխատանքի, այդ թվում՝ ողջ երկրով ազատությունից զրկման վայրերի արդյունավետ մշտադիտարկում իրականացնելու հնարավորության համար:

Ինչպես Դուք, անկասկած, տեղյակ եք, 2006 թվականին Հայաստանը միացել է «Խոշտանգումների և այլ դաժան, անմարդկային կամ արժանապատվությունը նվաստացնող վերաբերմունքի կամ պատժի դեմ» ՄԱԿ-ի կոնվենցիայի կամընտիր արձանագրությանը, որի 18-րդ հոդվածի 3-րդ մասով սահմանված է կանխարգելման ազգային մեխանիզմների արդյունավետ գործունեության համար անհրաժեշտ միջոցներ և պատշաճ ֆինանսավորում ապահովելու պետությունների պոզիտիվ պարտավորություն:

Փարիզյան սկզբունքների համաձայն՝ ֆինանսական անկախությունը կանխարգելման ազգային մեխանիզմի անկախության հիմնարար պահանջ է: Դա ապահովում է կանխարգելման ազգային մեխանիզմների՝ առանց ավելորդ ճնշման կամ ազդեցության գործառույթային և այլ որոշումներ կայացնելու էական կարողությունը: Ինչպես նշում է Միավորված ազգերի կազմակերպության Խոշտանգումների կանխարգելման ենթահանձնաժողովն իր 2010 թվականի կանխարգելման ազգային մեխանիզմների վերաբերյալ ուղեցույցում. ««Խոշտանգումների և այլ դաժան, անմարդկային կամ արժանապատվությունը նվաստացնող վերաբերմունքի կամ պատժի դեմ» ՄԱԿ-ի կոնվենցիայի (Կոնվենցիայի անվանման մեջբերումը Մարդու իրավունքների պաշտպանի աշխատակազմին է - խմբ.) կամընտիր արձանագրության համաձայն՝ իր գործառույթներն իրականացնելիս կանխարգելման ազգային մեխանիզմը պետք է ունենա ամբողջական ֆինանսական և գործառույթային անկախություն»:

Ներկայում գործող՝ Մարդու իրավունքների պաշտպանին հատկացվող ֆինանսական միջոցների նվազեցման արգելքը լայնորեն ճանաչվել է միջազգային լավագույն փորձ, և մենք այն ընդհանրապես մեջբերում ենք այլ երկրներին ուղղված՝ կանխարգելման ազգային մեխանիզմների հիմնադրման գործընթացին վերաբերող մեր խորհուրդներում: Իրապես, այս և անկախության մյուս երաշխիքներն են, որ Հայաստանի մարդու իրավունքների պաշտպանին դարձրել են այսքան ուժեղ և վստահելի գործընկեր խոշտանգումների և վստի վերաբերմունքի դեմ պայքարում: Մեր համագործակցությունը երկար տարիների ընթացքում հիմնվել է կանխարգելման ազգային մեխանիզմի (նկատի ունեն Հայաստանը-խմբ.) անկախության և տեխնիկական (նկատի ունեն մեքենաները - խմբ.) կարողությունների փորձի վրա:

Չնայած շար պեպություններ են բախվում բյուջեային սահմանափակումների, մասնավորապես, նոր կորոնավիրուսային համավարակի (COVID-19) դժվարին ժամանակահատվածում, միաժամանակ, այս ընթացքում է, որ հասարակության առավել խոցելի խմբերը գտնվում են մեծագույն ռիսկի ներքո: Ուստի, էական է, որ նման ժամանակներում նրանց պաշտպանության մանդատ ունեցող հաստատություններին ոչ միայն ցուցաբերվի աջակցություն, այլ նաև դրանք առավել հզորացվեն:

Նշված միջազգային չափանիշների և որպես «Խոշտանգումների և այլ դաժան, անմարդկային կամ արժանապատվությունը նվաստացնող վերաբերմունքի կամ պատժի դեմ» ՄԱԿ-ի կոնվենցիայի կամ ընդհանուր արձանագրությամբ, որպես անդամ պեպություն, Հայաստանի պարտավորությունների լույսի ներքո մենք առաջարկում ենք (recommend) պահպանել «Մարդու իրավունքների պաշտպանի մասին» ՀՀ սահմանադրական օրենքի գործող 8-րդ հոդվածի 5-րդ մասը՝ որպես Մարդու իրավունքների ազգային հաստատությունների և Կանխարգելման ազգային մեխանիզմների թվում լավագույն փորձ: Միաժամանակ, առաջարկում ենք (recommend) ապահովել, որպեսզի Մարդու իրավունքների պաշտպանի ֆինանսավորման հետ կապված օրենսդրական փոփոխությունների վերաբերյալ ցանկացած հետագա քննարկում իրականացվի Մարդու իրավունքների պաշտպանի հետ ամբողջական խորհրդակցությամբ:

Մենք հասանելի ենք հետագա տեղեկատվության և քննարկման համար:

**Հարգանքով՝ Բարբարա Բերնաթ
Խոշտանգումների կանխարգելման ասոցիացիայի գլխավոր քարտուղար**